

# LE VRAI VISAGE DE BANE HYPOCRITES

---

الوجه الحقيقي المنافقين

PAR

*Hazrat Amir'ul Momeneen Muhyi-ud-Din Mousli-ud-Din Al-Khalifatullah  
Munir Ahmad Azim*



## **LE VRAI VISAGE DE BANE HYPOCRITES**

Ena dimoune qui faire semblant, quand li devant publique, li prier Bondié avec dévotion ; mais quand li tout seul, so masque tomber nous trouve so vrai visage. Néanmoins, avec le temps, li reste dévouer pour accomplir so bane prescriptions divines. Qur'an décrire très bien sa bane qualité dimoune là comme suit : *« En vérité, bane hypocrites zot cherche à embête Allah ; Mais c'est Allah qui trompe zot. Quand zot lever pour faire Namaz, zot faire li avec paresse, ziste pou montrer lizié dimounes, mais zot pas pense Allah, sauf ene ti poigné ».*

Devant so bane plaisirs et so bane passions, l'hypocrite ena point l'affectation. Mais ene croyant qui éclairé par la Lumière divine facilement reconnaître ene hypocrite, car chaque chose ki li faire li laisse trace. Couma Qur'an fine averti nous : *« Si Nous ti envi, Nous ti pou montrer toi, Nous ti pou faire toi conner par zot bane caractères. Mais to pou reconnaître zot par zot doubles langages. Certes, Allah fine couvert zot actions. »*

Bane croyants pou reconnaître facilement bane hypocrites par zot visage et aussi par zot langages qui zot servi.

O Hypocrite ! Pas faire zefforts pour déclare toi couma bane croyants qui ena connaissance ! C'est par to bane actions et de to bane manières ki to fini conner ki to été ; Et to pas capave prend charge le monde car to bane la peines, zots inutiles ! Ecoute c'est ki Qur'an dire lor toi : *« Alors, Nous fine mettre devant zot, zot bane travailles ki Nous fine ranne en poussière qui faner. »*

To bane travailles qui to faire par hypocrisie péna valeur devant li yeux Allah. Repenti de to bane faussetés ; et de to bane l'espoir ki to donne dimounes ki ena crainte pour toi. Dégazer alle demande pardon to SEIGNEUR. Montrer impé modération dans to bane nourritures, dans to la boisson, dans to vêtements, avec to bane épouses, de to bane richesses. Exerce-toi pou pratique l'abstinence, la modération, la prudence ; Soigne-toi à ene meilleure conduite. Limite to bane devoirs, to bane pensées et de to bane activités sauf c'est ki nécessaire. Cherche avec ene Seul Bondié (Ki Vrai) tou sa ki bon et vrai à So lizié. Dans tous bane zaffaires, suivre chemin kot les zot ena crainte pou Li et ki espère de Li.

Le cœur d'ene sage, celui ki conner et prévoir, li reste prudent li zour ek la nuit. Pour sa qualité dimoune là, péna l'été, péna l'hiver ; li pas gagne frais, li pas gagne chaud. Si ena ene vallée pour bane vulgaires, même pou bane sages et pou bane ki prudent aussi ena ene. Assurément, les deux pas pou pareil. Seuls bane sages ki capave saisir le vrai sens des idées.

Hypocrite, joine toi avec bane sages ! Quitte to bane ruses et mensonges car zot pas pou ena valeur pou toi. To pé prétendre ki to peur Bondié, mais en réalité to peur dimoune. To dire ki to ena l'espoir zis avec Bondié, mais en réalité tous to l'espoir fine bâtir zis lor dimoune ! Celui ki ena crainte Bondié li pas peur bane la peines dans sa le monde là, ni li laisse li tourmenter de l'autre la vie. Li peur juste le Vrai Justicier ; Celui avec ki dans So la main repose nous bane actions et tous qualité créatures.

O bane ki ena faiblesses dans zot la foi, vine en foule vers le Mousli-uddin (Réformateur de la Religion) ou le Muhyi-ud-din (le Revificateur de la Religion), afin ki li enseigne zot de zot la religion et ki li ajoute sa qui zot manqué. Quand Bondié ouler le bien pour So bane serviteurs, Li faire zot détacher de zot égoïsme ; si sa serviteur là réussi surmonte tous bane épreuves ki Bondié donne li dans So chemin, alors

Bondié pou accorde li ene grand bénédiction. Li pou éleve sa dimoune là dans so la vie spirituelle, Li pou détruire so existence illusoire et Li pou donne li ene existence réelle.

O zenfant ! Cherche compagnie de bane sages et bane dimounes pieux, alle prend zot conseils. C'est la seule façon pou zot tire profit et avantages de sa le monde-là et de l'Au-delà. Na pas gaspille zot le temps attanne X, Y, Z avec ki zot pas pou gagne nannié sauf avec Allah ; dans la main de bane dimounes zot pas pou gagne ni profit, ni perte !

O toi qui triste et ki fine perdi la force ! Prends patience, car ena sa possibilité là ki zot sorti dans zot tristesse et regagne goût à la vie. Chaque difficulté ena ene solution. Bane avantages qui zot pé souhaiter dans sa le monde là et dans l'autre monde et pou la vie futur, c'est zisse avec Allah ki nous attane sa, pas avec les autres car zot péna le pouvoir accorde sa qui to pé souhaiter.

Dans Qur'an, Allah fine dire : « **O fils Adam ! Si to commettre ene injustice envers ene kikene, to pou témoigné ki tout pou ranne toi de sa injustice la ; et to pou primer de to bane actions.** » Alors, couma se peut-il ki to pas pou priver de la Miséricorde divine quand to fine éloigne toi de bane croyants et to fine faire zot souffert de to bane injustices ?

Hazrat Mohammad <sup>(s.a.w)</sup> fine dire : « **Faire dominère et agir injuste envers ene croyant c'est ene péché ki 15 fois plus grave ki détruire la Kaaba.** »

O fils de l'homme ! Écoute bien mo bane paroles : guette to situation qui qualité li déplorable, car to trouve to-même enchaîner dans bane conditions meurtrières ; to fine plonge to-même dans ene trou cotte to pou gagne la colère d'Allah.

O l'incroyant cruel ! Couma se peut-il ki to pas fine pensé pou évite faire dominère lor bane dimounes pieux et bane ki ena confiance en Bondié So la Justice et So Miséricorde ? To cas li bien désolant, pense bien ki dans ene ti peu le temps to pou quitte sa le monde là ; Nous pou arrache toi dépi dans to la caze ; et certains rôdeurs pou prend tou sa ki to ena, ou plito sa ki to penser to ena. C'est sa la vérité. Bé ki faire to persister dans to l'insouciance et to toujours ena le cœur dur. Pou ki to capave retire sa dureté la dans toi, mais zis pense la mort ; alle visite bane Qabarasthaan, lire Qur'an et bane Attributs d'Allah. Le Prophète Mohammad <sup>(s.a.w)</sup> fine dire : « Bane zaffaires dans sa le monde là et bane péchés zot salir le cœur ki même zot pas capave penser et bane révélations pas refléter dans miroir sa le cœur là. » Pou polir sa la glace là, bizin faire zikr.

O bane peuples, Alle cherche tous moyens kot zot capave gagne Allah so Miséricorde ; Faire zeffort pou conne plisse lor là, alle découvert so principe et couma gagne li. Allah Li 'Miséricordieux' et Li aussi 'Pardonnant', Li tou sel capave pardonner. Eski ene l'autre capave faire sa ? Si Li pas ti ena pitié pou nous, bé qui sanela ti pou ena sentiment pou nous alors ? Si Li pas ti ena la bonté pou pardonne nous bé qui sanela ti pou efface tou nous bane péchés ? Ene sel trait Li capave retire tous nous bane dettes, à parte Li, qui sanela capave faire sa ?... A part Bondié, avec ki ene serviteur capave cherche aide ?.. ene sauveur ? ene clément ? ene miséricordieux ?... ene pardonneur ?

**Munir Ahmad Azim**

**Hazrat Amir'ul Momeneen Muhyi-ud-Din Al-Khalifatullah**

17 Septembre 2008

## **Bane Vrais Visages des bane Hypocrites**

### **Introduction**

Ene Musulman bizin suivre l'exemple de la vie du Saint Prophète <sup>(s.a.w)</sup>. Tout musulmans en entier, surtout bane Ahmadis bizin étudier et comprend tous bane pratiques de Hazrat Mohammad <sup>(s.a.w)</sup>. Pou vine ene bon musulman, bizin ki évite coz menti et vine ene hypocrite. Et pou évite sa deux faiblesses là sakaine parmi nous bizin montrer ene l'amour directement dans le cœur et dans l'âme pour le prophète <sup>(s.a.w)</sup>, mais non pas en parole seulement. Couma bizin ena sa l'Amour là pou Allah ek So Messenger et pou mettre en pratique sa ki nous Bien-aimé Prophète <sup>(s.a.w)</sup> fine enseigne nous ? Alors évite l'hypocrisie et coz menti.

Ene vrai croyant bizin pas écoute bane hypocrites. C'est Allah ki ou bizin obéir et Li ou Protecteur. Allah conne très bien séki ena dans lécoeur de chaque dimoune. C'est pour ça Allah tester sakaine parmi nous pour ki Allah rende nous lécoeur et nous l'esprit pur. Bane hypocrites c'est bane ki cause beaucoup et pas faire nannié. Toujours zot tire bane prétextes. Séki zot dire avec zot la bouche, c'est ki pena dans zot lécoeur et zot pas réaliser ki Allah conne très bien séki zot cassiette.

### **Mensonge ou la nature d'hypocrisie**

L'Islam interdit coz menti. Le Prophète <sup>(s.a.w)</sup> fine dire : « Celui avec ki nou trouve sa quatre kitsoz là, zot considérer couma bane hypocrites ou zot ena trait d'ene hypocrite à moins ki li débarrasse li de sa :

- 1) Si nous confier li ene dépôt et li trahir sa,
- 2) Kan li causé, li pé cause menti,
- 3) Kan li faire ene pacte, li pas respecter sa deal là et
- 4) Kan li plaidé, li ena ene mauvais caractère

Ena plusieurs qualités mensonges, par exemple, faire fraude, malhonnêteté, embete ene kikène etc. Satan bien content kan kikène coz menti. Li mettre ene mauvais l'odeur dans la bouche sa menteur là. Coz menti efface tous bane bonnes actions pareil couma ene di bois ki brûler. Bane Anges reste à l'écart de bane menteurs. Allah pas guide ene menteur et plito Li donne li ene punition bien sévère zour ki nous pou ranne compte are Bondié. Menteur là pou ena so nené, so li yeux ek so la massoir dessiré. Ene musulman li bizin constamment rappeler ki li bizin coz touzour la vérité dans n'importe ki situation li été. Allah content bane dimounes ki coz vrai (bane véridiques). Mensonge ena ene mauvais l'effet lor conduite d'ene bon croyant kot li amène li vers so perte; li diminué la crainte d'Allah (taqwa) dans so le cœur et li pas obéir Allah So bane la Loi.

Dans ene Hadith ki fine rapporté par Abdoullah Ibn Masud <sup>(r.a)</sup>, li fine dire ki le Messenger d'Allah <sup>(s.a.w)</sup> fine dire : « Dire la vérité car la vérité pou amène zot vers Paradis. Ene dimoune bizin continuer dire la vérité et reste coz vrai ziska ki Allah considère li comme ene dimoune véridique. Faire tension si coz menti, car quand coz menti, sa amène ou vers ou destruction dans l'enfer. Celui ki continié coz menti Allah considère li comme ene grand menteur. »

Fine conseille bane Musulmans ki zot bizin contrôler à moins ki kan zot coz sa ki bon avec bane dimounes car c'est dans silence même ki ena sécurité.

« Celui qui croire en Allah et au Jour du Jugement soi li coz bien ou soi li reste tranquille. »

Allah pas content bane menteurs et Li pas pou guide zot, au contraire Li pou maudit zot.

### **Description de bane hypocrites dans Qur'an**

Allah <sup>(s.w.t)</sup> fine révèle ene chapitre exclusivement lor bane hypocrites cotte Li fine décrire bane hypocrites. Façon ki bane hypocrites faire avec bane Messagers d'Allah, Allah <sup>(s.w.t)</sup> même révèle So serviteur choisi quand ou lire dans Qur'an kot Allah pé révèle So Rassool Hazrat Mohammad <sup>(s.a.w)</sup> façon ki bane hypocrites faire, Allah dire quand sa bane hypocrites là vine kot toi, zot dire : « ***Nous témoigner ki to même Messenger Allah.*** » Allah dire Li même Li témoigner ki sa bane hypocrites là pé coz menti. Zot servi zot serments couma ene paravent, pour faire croire zot avec le Prophète d'Allah <sup>(s.a.w)</sup> et tous sa là zot pé faire zot plan couma pour barre dimoune dans chemin Allah. Qui faire zot faire coumsa, au commencement zot fine croire dans Message Allah et So Prophète et ensuite zot fine rénier zot croyance, c'est pour sa raison là ki zot agir comme sa et divan lizié d'Allah, c'est ene très mauvais action ki zot fine faire et alors Allah détester zot pour toujours kot Allah même mettre ene scellé lor zot le cœur et quand Allah fine scelle zot le cœur zot ne plus comprend nannié.

### **Bane hypocrite faire kitsoz ki émerveille dimoune**

Bane hypocrites faire bane kitsoz ki émerveille bane dimounes ki trempe dans zot la sauce. Qui faire ? Façon ki hypocrite faire, quand to guette zot, zot le corps émerveille toi, et si zot causer, to écoute zot paroles, et zot pé cause menti et ou, ou trouver ki sa li vrai et intéressant. Allah dire, ki zot couma paquets du bois appuyés dans ene coin, et zot même ki prend tous crier ki zot tender couma dire fine crier contre zot et zot vexer. Sa même hypocrite sa, zot ou l'ennemis, faire attention avec zot, ene seul coup zot perdu ou, zot tire, tire zot les dents avec ou, zot passe pou bon divant ou et derrière ou, zot tranche ou avec zot la langue, et Allah détruire zot complètement sans ki zot réaliser.

### **Bane hypocrites même ki dire toute sorte kalité causer lor le Prophète <sup>(s.a.w)</sup>**

Bane hypocrite c'est bane dimounes ki marche travers et faire bane les autres dimounes aussi suivre chemin travers, et c'est sa bane hypocrite là même ki mettre toutes sortes de blâmes et accusations lor Serviteur d'Allah, et bane les autres dimounes ki autour le Messenger d'Allah. Zot faire toutes sortes qualité désordre pou ki sa bane dimounes là quitte le Messenger d'Allah et pas dépense dans le chemin d'Allah. Mais bane hypocrites tellement lizié fine voilé, zoreille fine gagne diplon et le cœur fine scellé ki zot oublier ki Allah Ki possède trésors bane le ciel et la terre, mais bane hypocrites pas pou comprendre le travail d'Allah zot.

O bane hypocrites ! Pas penser avec tous zot plans et complots ki zot pou capave diminuer pouvoir Allah lor la terre. Pense bien, ene jour zot pou retourne devant Allah, Li pou informe zot de ce qui zot ti faire. Faire bien attention ki ene malheur ou ene punition douloureux pou tombe lor zot.

### **Bane hypocrites, zot senti zot déranger quand ene Prophète vini depi kot Allah**

Zot dire ki extraordinaire ena avec li, li seulement ene dimoune pareil couma nous et li oulé montrer so supériorité lors nous. Li manger, boire couma nous tous, li fine vine créer désordre et déranger nous dans la vie luxe lor la terre. Zot dire ki li seulement ene dimoune ki fine invente ene fausseté lor Allah et nou pas pou accepter ce qui li dire, li seulement ene dimoune fou, li ene menteur, li faire la sorcellerie, etc.

### Bane Messages zot prend en badinage

Bane hypocrites, n'importe ki nouveau Message zot gagner depuis kot zot Maître, zot écouté et zot prend li en badinage, et zot le cœur aussi dans distraction. Et sa bane hypocrites là discute en secret et zot dire : « **Est-ce ki li pas ene dimoune pareil couma nous-même ? Et nous pou accepter so magique (couma ene sorcier) avec nous grands lizié ? Et zot dire non ! Non ! C'est pas possible, li dire ki li gagne révélation de coté Allah et li vine invente bane fausseté et ou, ou alle croire dans li, tous sa là c'est ene paquet rêves maille maillés ; ki li même fine inventé et li dire sa c'est révélation !** »

### Tourne le dos avec Allah So Message

Allah dire : « *Sa bane dimoune hypocrites là fine tourne le dos avec Mo Message, sure et certain ki li pour gagne ene la vie misérable et li pou reste aveugle jusqu'à le Jour Jugement.* » Allah dire dans Qur'an : « *C'est comme sa même ki nous pou récompense hypocrites, et sans doute punition dans la vie future pou plus sévère et plus dure.* »

### Bane hypocrites servi zot serment

Bane hypocrite servi zot serment pou trompe l'un à l'autre. Sinon zot lipié pou glisser malgré ki zot fine place li ferme et zot pou goûte ene mauvais quiquechose, parce qui zot fine barre dimoune dans chemin d'Allah et faire bien attention ki pas faire commerce avec contrat ki ou fine faire avec Allah, pou ou gagne l'honneur divant lizié créature. Zot reconnaître bane faveurs Allah, mais après zot refuse accepter sa et sa c'est rôle ene hypocrite.

### Bane hypocrites kimé lors mimbar et dans tous coins

Bane hypocrites dire : « **Ça bane là (bane qui éna la crainte d'Allah) pou garde carême (roza) jusqu'à zot déperi, zot pou lire Namaz jusqu'à zot front et nez nez pou izzé, là aussi Allah pas pou accepter zot doah et zot pou brûler dans l'enfer** ». Couma dire sa bane hypocrites là, c'est zot ki créateur de l'univers, couma dire nous manger, boire et l'honneur trouve dans zot la main, et zot (bane hypocrites là) dire : « **Si ou zenfant fréquente ene zenfant Tamil, li pou appranne lève cavadee et quand trouve zot (bane serviteur choisi d'Allah) batte carté avec zot** ». Voilà langage hypocrite. Zot même zot servi bane langage bien vulgaire et après zot dire bane humble serviteurs d'Allah ki servi langages vulgaires !

Allah pas tarder avec sa bane hypocrites là, guette situation de zot bane zenfants. Et sa bane zenfants là sois-disant fine dédié zot dans le chemin d'Allah. Maintenant dans ki chemin zot pou amène bane dimoune ? Chemin Allah ou sois sa lotte chemin là... ? Bane hypocrites croire ki bizin batte carté avec bane croyants mais c'est Allah <sup>(s.w.t)</sup> ki faire bane croyants battre carté avec bane hypocrites (bane mullah de sa l'époque là sa). Avec le doah du Serviteur d'Allah zot ti pé vine lire bane texte reçus, azordi zot tourne le dos avec Signe et Manifestation Divines à cause *Shirk* de bane créatures fine envelopper dans zot la cervelle et moi Allah So Messenger pé dire zot ki Allah pas pé presser avec zot, Li pé donne zot le temps pou zot repentir, si non, zot pou tombe couma ene papaye pourri, ki pou donne l'odeur et moustique. Si Allah ti ouler maille bane hypocrites pou tort ki zot faire, Li pas ti pou laisse ene seul vivant lor la terre, mais Li donne zot ene délai, jusqu'à zot terme, et quand l'heure là fine arriver, zot pas pou capave avance li d'une heure de temps, ni zot pou capave retarde li. Ene hypocrite, li pareil couma ene lichien. Si to attaque li, li tire so la langue. Si to quitte li tranquille li tire so la langue pareil. Sa ene l'exemple ki Allah fine donne nous lor bane dimoune hypocrite ki fine rejette bane manifestations

divines ; Allah même fine mentionné dans Quran ki Li pou amène zot vers zot destruction doucement doucement dans ene façon ki zot pas réaliser. Quand Allah accorde So Faveurs à bane hypocrites, zot tourne le dos et reste loin à coté, mais quand du mal touche zot, zot désespérer.

### Hypocrites amène zot disputes devant zot idole

Depuis création l'univers, bane hypocrite jamais zot fine satisfait avec c'est ki Allah fine faire lor l'humanité en général et bane hypocrite ki tourne les dos avec tous bane faveurs d'Allah. Sans zefforts de l'homme, Allah <sup>(s.w.t)</sup> fine mettre tous à la disposition de l'homme, mais très peu ki reconnaître sa bane Faveur là et zot montré zot reconnaissance envers Allah et So Message ki Li (Allah) envoyer à travers So Messenger. Bane hypocrites, zot zis bon pou faire bane show, comme-ci dirait zot bane bon dimounes et zot tire zot les dents, et avec sa même les dents là zot perce bane croyants, boire disang de bane croyants par pipe et quand ou guette zot façon ki zot causer, façon ki zot comporte zot avec ou et pli bon dimounes ki zot péna.

Allah <sup>(s.w.t)</sup>, dans Qur'an Shariff plusieurs place Li fine donne sa l'instruction là, ki ene message très très important, ki bizin rejette bane idoles, bane ki péna pouvoirs et même ki pas capave créer ene la patte mouche. Mais hélas, zot le cœur fine vine noir, fine brûler couma nous Bien-aimé Prophète <sup>(s.a.w)</sup> fine dire la jalousie, li pareil couma difé brûle di bois sec. Tellement zot pas bane dimounes sincères, zot rier, causer avec ou, mais en dans zot le cœur pé brûler et sa même le cœur là fine vine noir et zot tombe dans marée noire, pareil couma sa fourmi noir là, dans marrée noire, li lor ene roche noir, c'est ki veut dire, avec zot hypocrisie, zot le cœur vine noir et zot tombe dans marrée noire et zot vine couma ene shaytane, zot alle espionne zot camarade, mettre doute, faire palabre, invente bane fausseté, mettre bane fausses accusations et zot passe zot pou bon dimoune. Zot agir dans ene tel façon ki prétend ki zot accepter Message d'Allah ki fine dessane lor Allah So Messenger et Message ki fine descendre lors bane Prophètes <sup>(a.s)</sup> avant et zot disputer lors sa bane messages là et finalement zot amene zot dispute divant zot idoles pou juger. Et pourtant zot fine gagne sa Message là ki vine dépi kot Allah, pou rejette idoles, mais quand le cœur fine vine noire, satan profite encore pliss pou brûle le cœur là pou faire li vine pli noir encore, kot zot égarer bien loin are chemin droite.

### Donne zot Message d'Allah

Quand approche avec zot et donne zot ene Message ki Allah <sup>(s.w.t)</sup> fine envoyé à travers So Prophète, to trouve sa bane hypocrites tourne zot figures avec la haine. Mais quand zot dans ene difficulté ou ene malheur tombe lor zot, à cause bane mauvaises actions qui zot fine faire avant sa, l'heure là to trouve zot pou dire bane croyants, ou le Messenger ki « **prier pou nous** » et zot faire serment lor nom d'Allah, ki Allah zot Témoins « **qui nous ena ene bon l'intention pou faire du bien et réconcilier** ». Pou sa bane qualités dimoune là, Allah dire dans Surah An-Nisah qui seulement Allah tout seul ki conne sa bane qualités dimounes là zot le cœur.

Alors sa même Allah fine dire dans Qur'an, ki sa bane qualité dimoune là bizin évite zot, mais seulement donne zot bane conseils et dire sa bane qualité dimounes hypocrites là, bane paroles ki capave touche zot le cœur. Alors sa c'est bane dimounes ki fine faire ditort à zot propre n'âme, zot pas pou gagne la foi, Allah même témoin ki zot pas pou gagne la foi (dans Qur'an Allah dire : *'Rabbika laa yuminuuma'* – *to Maître ki témoin*)

### Ene bonheur arrive zot

Sa bane qualités dimoune là, si ene bonheur arrive zot, zot dire : « **Sa vine de Allah** ». Mais si ene malheur tombe lor zot, zot blâme le Prophète d'Allah et zot attaque le Prophète d'Allah, kot zot dire : « **ki sa ki fine arrive nous là, sa vine de toi** », mais Allah protège So Envoyé kot Allah même dire, « *pas blâme Mo Envoyé, tout vine de Allah, c'est qui fine arrive ou là* », Allah dire ki « *Zot bane dimounes sans comprend, sa malheur ki tombe lor zot là, vine de zot propre faute et sa même sa bane qualités dimoune là discute pendant la nuit lor bane kitsoz ki Allah So Prophète pas fine dire et zot alle la porte, la porte pou convaincre bane les autres.* » Mais Allah dire dans Qur'an : '*Wallaahu yak-tubu maa yubayyi-tuun*'. Ici Allah pé faire comprend, c'est Moi **Allah** ki fine écrire tout c'est qui zot fine causer pendant la nuit et action ki zot fine faire pour dévier dimounes lor le droit chemin. Allah donne So Envoyé sa l'instruction là : « *Quitte zot, pas reste même en compagnie de sa bane qualité dimoune là* ». Dans Surah An-Nisah Allah décrire bane l'autre qualité hypocrites.

Allah dire ou pou trouve ene bane l'autre hypocrites qui cherche gagne ou confiance et confiance l'autre communauté là aussi. Alors zot même zot pas conner kot zot été, ni dans l'un et ni dans l'autre.

### Bane hypocrites cherche trompe Allah

Bane hypocrites dépi Allah aussi zot pé rode tromper. Qui qualité sa ? Mais zot pas conner ki Allah <sup>(s.w.t)</sup> jamais zot pou capave trompe Li et Allah pou retourne zot tromperie lor zot. Pou bane hypocrites Allah fine dire dans Qur'an, '*Innal munaafiqiina fid-darkil asfli minan-naar : wa lan tajida lahum nasiiraa.*' - Bane hypocrites pou dans dernier profondeur difé. Et to pas pou capave trouve aucaine aide pour zot. Dans ene l'autre verset dans Qur'an, Allah dire : zot fine refuse croire, rejette Nous Message et barre bane les autres dans le Message d'Allah ki Allah fine envoyé et zot rendre chemin là travers, Allah dire '*ulaaa-ika As-haabul jahiim*' – zot pou vine camarades difé l'enfer.

### Bane mouvement et prospérité de bane hypocrites

Zot rode embête bane croyants sincères, mais zot pas penser ki zot jouissance pour bien courte.

Hypocrites c'est bane ki bien jaloux aussi et ena bane mauvais pensées. Zot jaloux ki Allah donne ene plus ki l'autre là et zot tellement jaloux li pareil couma dibois sec consomme difé plisse.

Kan zot jaloux prend zot, zot dire : « **Nous pli pur ki lézot.** » Mais Allah dire dans Quran (Ch.4 V.50) : « *Estceki to fine considère cas bane dimoune ki dire zot même pur ?* » Seki Allah pé rode dire : « *C'est Moi ki rende pur séki Mo oulé ; et zot jaloux bane dimoune ki Mo (Allah) fine déverse Mo faveur lor zot et l'heure là-même par zot jaloux, zot dire toute sorte kalité causer contre ça dimoune ki Allah fine donne So faveur là* ». Dans Quran (Ch.4 V.62-63) Allah dire : « Kan dire zot : « *Approche avec message ki Allah fine envoyer et avec le prophète* », to trouve bane hypocrites tourne zot figure are toi avec la haine. Et kan ene malheur tombe lor zot, à cause bane (mauvais) actions ki zot fine faire avant ça, to trouve ça bane hypocrites là vine vers toi et faire serment : « **Allah nous témoin, nous l'intention c'est seulement pou faire du bien et réconcilier.** »

Allah dire : « **Ulaaa' ikallaziina ya' lamullaahu maa fii quluubihim fa'ariz anhum** ». - *Ça bane là Allah conné très bien séki ena dans zot lécoeur.*



Bane hypocrites, bizin évite zot, et kan zot vine vers ou, dire zot bane paroles ki capave touche zot lécoeur. Bane hypocrites kan zot parmi le prophète d'Allah, bane croyants, zot cause l'obéissance, mais kan zot quitte le prophète d'Allah so compagnie, zot alle discute pendant la nuite bane kitchose ki pas fine dire. Allah dire : « **Wallaahu yaqtubu maa yubayyitum** » - *Mo écrire tout séki zot causer pendant la nuite.*

Et après Allah dire : « **Fa ariz anhum** » - *Quitte zot !*

C'est bane hypocrites même ki dire : « **Pas cause avec zot, mette boycott et pas faire zot Salaam.** » Pourtant dans Quran Shareef, Allah dire dans Ch.4 An-Nisah V.86 : « *Kan dimoune faire ou ene Salaam, soit faire zot ene plus joli salaam encore, ou bien retourne zot ene Salaam pareil.* »

Analyse et étudier ça verset là bien, ki Allah pas fine dire zis pour bane croyants adresse ou Salaam, ou soit réponde zot ene pli joli Salaam ou bien pareil. Non ! Allah fine mentionne : « **Kan DIMOUNE** » ; Salaam là adresser à tous dimoune, ki so croyance, ki so religion !

Bane hypocrites, zot ki oulé mette contrôle lor chaque dimoune pour dire avec ki sanlà faudé pas faire Salaam. Et ça bane kalité dimounes là, aussi pé obéir ça bane hypocrites là couma zot bondié et Allah fine faire zot retourne à zot hypocrisie. **Séki Allah dire faire, ça zot pas pou faire !** Séki hypocrite dire, ça zot pou montrer l'obéissance ! Alors zot fine peur hypocrite plisse ki Allah, le Créateur de l'Univers.

### **Ki travail de bane hypocrites ?**

Hypocrite so travail, pareil couma bane *Kafir*, péna différence lors là, hypocrite aussi zot envi ki ou perdi la foi couma zot même et ki ou vine hypocrites pareil couma zot même. Zot essaye cassiète zot bane péchés avec bane dimounes, pou ki zot passe couma bon dimoune, mais zot pas pou capave cassiète zot péchés avec Allah. Allah, Li Celui Qui conne tous ou bane secret et c'est ki ou laisse voir.

### **Ena lotte kalite hypocrite**

Allah dire ça clairement dans Quran Shareef concernant ça lotte kalité hypocrites là. Allah dire : « *Lotte hypocrite ki cherche gagne ou confiance, et confiance lotte communauté là-aussi. Mais chaque fois ki kitchose pousse zot vers la révolte, zot retourne là-dans. Si zot pas laisse ou tranquille et pas faire la paix avec ou et pas retenir zot la main contre ou,* » ou bizin éloigner avec zot et pas donne zot aucaine l'importance, et si zot insister, bizin la guerre contre zot.

Alors ça kalité hypocrites là pou dire ou ki sanlà musulman et ki sanlà pas musulman, ki sanlà bizin faire Salaam et ki sanlà pas bizin faire Salaam ; ou soit réponde zot par « *alaikum* » ou « *Walaïk* ».

Kot Allah So l'enseignement fine allé (Quran) ? Et c'est ça bane là même ki pé dire ki c'est zot même ki bane bons et vrais musulmans. Et c'est zot même ki fine piétine l'enseignement d'Allah enbas zot lipié. Ki compte zot ena pou alle render devant Allah, ça bane kalité dimounes là ? Moi mo pas là pou faire aucaine jugement de personne so la foi, mais c'est Allah ki Le Meilleur Juge, et c'est Li ki conne la foi de chaque dimoune. C'est pas moi, et personne dans ça l'univers là ki capave juge la foi de n'importe ki !

### Ki sanla ou pou suivre ? Allah ou soit hypocrites ?

Dans Ch.4 An-Nisah V.95, « **Wa laa taquuluu liman alqaaa ilay'kumus Salaama lasta Mumi'naa.** » - *Pas dire à celui ki faire ou ene Salaam, « to pas ene Musulman ».*

Alors, c'est ça bane kalité dimounes là ki pou juge la foi dimounes, ki sanlà Musulman et ki sanlà pas Musulman. Nous Aka Hazrat Muhammad <sup>(s.a.w)</sup> même pas ti gagne ça patente pour juge la foi dimoune. Bé, ou bane hypocrites imbéciles, ki sanlà fine donne ou ça patente pou juge la foi dimoune, kan ou même ou pas encore connue degré de ou la foi ? Et pas ena aucaine dimoune lor ça la terre là ki capave dire avec ene full certitude ki li ena 100% la foi. C'est zis Allah <sup>(TWA)</sup> ki Le Meilleur des Juges pour connue chacaine so la foi. Et dans Quran Shareef, Allah dire : « *Dire ki ou fine accepter l'Islam, mais pas dire ki ou fine gagne la foi.* »

### Pas plaide pou bane hypocrites

Dans Quran Shareef même Allah fine explique ça clairement dans Surah An-Nisah V. 106-109 : « *Pas plaide pou bane traître (hypocrites), pas plaide pou ça bane ki fine trahir zot propre l'âme.* » Et Allah dire : « *Ça bane kalité traîtres (hypocrites) là, ki fine trahir et faire péchés. Allah même détester zot.* » Et Allah <sup>(TWA)</sup> dire : « *ça bane là, zot cherche cassiette zot bane péché avec bane dimounes, mais zot pas pou capave cassiette zot péchés avec Allah. Kan zot discuter la nuite et zot servi bane telle paroles ki pas faire Allah plaisir ditout.* » Et Allah continuer dire dans prochain verset : « *Ça kalité dimounes là, ki sanlà pou plaide pou zot, et pou occupe zot z'affaire le Jour du Jugement ?* »

Hypocrites, travail pou faire péchés, après li envoie ça blâme là lor ene innocent. Allah dire dans Quran (Ch.4 V.113) : « *li (hypocrite là) pou sans aucaine doute saryé ene fausse accusation et ene péché lor so lédos.* »

Dans bane hypocrites, péna aucaine du bien dans zot conversation secret, et c'est ça bane là même ki oppose le prophète d'Allah et bane croyants, après ki le bon chemin fine bien explique zot. Allah dire pour ça bane kalité dimounes là : « *Nous pou laisse zot continuer reste kot zot fine tourner là.* »

Celui ki prend hypocrites comme camarades à la place de bane dimounes pieux, li claire ki li fine faire ene grand perte dans so la vie. Hypocrites faire bane grand grand promesses, faire gagne l'espoir ki fausse – c'est seulement pour embête dimounes. Zot faire croire ki zot fine gagne la foi, après zot rejette la foi. Ensuite zot ré-gagne la foi, et rejette li encore. Ça augmente zot infidélité et hypocrisie plisse. Et Allah dire : « **Bashir'il Munaafikuuna bi' anna lahum azaaban aleema.** » - *Donne nouvelle à bane hypocrites, ki zot pou gagne ene punition ki faire bien du mal.*

Bane hypocrites, zot cherche trompe Allah, mais Allah Le Tout-Puissant, retourne bane hypocrites-là, zot tromperie lor zot-même, et zot-même zot pas conné kot zot été, couma dans Quran Allah dire : « *Ni zot avec ça groupe là, ni avec lotte groupe là* ». Et Allah laisse zot égarer et zot pas trouve ene bon chemin. Bane ki ena la foi, si zot prend hypocrite comme zot camarades, et zot écoute li tous séki li dire, abé zot aussi zot pou contaminer pareil couma hypocrite là même. Alors au lieu ou faire camarade avec bane hypocrites, faire camarades avec bane *Muttaki* (dimounes pieux).

## Hypocrites, mauvais causer en publique

C'est hypocrite même ki pour aller partout, dibouter dans bane l'assemblée cause bane mauvais causé en public. Pour li, c'est la gloire et li prend li comme ene héro kan li pé cause bane mauvais causer en public, et li trouve bane dimoune ki péna *taqwa* (la crainte d'Allah) dans zot lécoeur et pé riyé fort fort pé applaudi li et en même temps li pé sème la haine dans lécoeur et division parmi ça bane dimounes là. Allah révèle moi ceci en même temps :

« *Ulaaa'ika humul munaafiquuna haqqa : wa'a tadnaa lil munaafiquuna azaabam muhiinaa.* » - *C'est zot bane vrais hypocrites ; Et Nous fine prépare pour bane hypocrites ene punition pour abaisse (humilié) zot.* »



## REVELATION A PROPOS HYPOCRITES

LUNDI 15 SEPTEMBRE 2008 APRES ZOHR A 14HRS

DANS LE MOIS DE RAMADHAN

*Yâ Khalifatullah, Wallaahu Yuhibbul Muttahhireen.*

*O le Khalifatullah, Allah content bane dimounes ki purifier zot.*

C'est zot bane premiers ki fine accepté la proclamation de **Khalifatullah** et zot trouve zot dans le **Jamaat Ul Sahih Al Islam**. Si zot trouve zot dans le Jamaat Ul Sahih Al Islam, c'est à cause de zot bane bon actions, et zot sincérité. Pas vine hypocrites ; Allah pas content bane hypocrites. Bane hypocrites, zot tête dans zot hypocrisie. O Muhyi-ud-Din Khalifatullah ! Toi, to pas conne zot, mais Nous, Nous conne zot très bien. Nous pou donne zot double punition, et après, zot pou retourner pour ene l'autre grand punition encore.

Li pas possible ki Allah faire dimoune égarer, après ki Li fine faire zot témoigne plusieurs signes et manifestations et fine donne zot aussi bane plusieurs signes pour prouve to véracité et après ki Allah <sup>(swt)</sup> fine guide zot jusqu'à faire zot bien comprend ki kitchose bizin éviter. Pense bien : « *Innallaaha bikulli Shay-in Alim* » - Et Allah conne tout.

O bane ki pé écoute ça révélation là, si vraiment ou ena ene sincérité totale et ene la foi pure pour Allah et So humble serviteur, faire la guerre contre bane hypocrites ki autour de ou, et faire zot voir ki ou ferme. Kan ene message descende dépi kot MOI (Allah) bane hypocrites là faire boufon et ridiculise Mo message. Zot dire : « **Est-ce ki ena kikaine parmi ou ki so la foi fine augmenter par ça ?** » To trouvé ça bane hypocrites là, couma ena ene maladie dans zot lécoeur. Li faire zot saleté vine plus sale encore. Chacaine de ça bane hypocrites là guette so camarade, zot casse ene grand riyé, et zot tourne zot lédos. Allah dire, « Dire zot : « *Laahu quluu bahum bi 'an nahum qawmullaa yaf'qahuun* » - Allah tourne zot lécoeur, parce ki zot bane dimoune ki na pas comprend.

Pourtant parmi zot même « *jaaa-akum Rasuulum min anfu-sikum* » fine déjà arriver ene messenger, ene dimoune couma zot même.

Bane hypocrites, c'est bane ki cherche trompe Allah et bane ki ena la foi, mais en vrai-dire, zot pé trompe zot-même, sans réalise so conséquences de séki zot faire et zot lécoeur ena ene maladie. Allah laisse zot maladie augmenter.

Quand zot joinde bane ki ena la foi, zot dire : « **Nous aussi, nous ena la foi** », mais kan zot tout seul avec zot bane camarade pareil couma zot, zot dire : « **Nous ti pé faire ene plaisanterie** ». Zot dire entre zot-même : « **To croire, estce ki nous pou accepter pareil couma ça bane imbéciles là fine accepter** ». Allah dire : « Dire zot : « **Alaaa innahum humus Sufahaaa'u walakillaa ya'lamuun** » - Zot même bane imbéciles et zot pas réaliser. Ça bane hypocrites là pas penser ki zot pé moque d'Allah. Laisse zot continuer dans zot moquerie, zot plaisanterie, et zot pou viré tourner dans vide et zot pas penser ki zot fine large bon chemin pour attrape mauvais chemin.

Ti ena ene la lumière ki ti autour de zot, zot pas fine conne valeur la lumière là. Zot fine commence zot hypocrisie et zot hypocrisie fine amène zot loin de ça lumière ki ti autour de zot là et Allah <sup>(swt)</sup> fine enlève ça la lumière là de zot et fine quitte zot dans l'obscurité, de sorte ki jamais zot pas pou trouve claire encore, à moins ki zot repenté sincèrement avec Allah <sup>(swt)</sup>.

Bane hypocrites, c'est bane ki bien têtue dans zot discussion et kan zot tourne lédos avec Allah et So messenger et zot dépêcher pour créer désordre entre bane dimounes ki écoute le message d'Allah à travers So prophète. Ça c'est bane hypocrites ! Zot rode détruire récolte ki Allah et So prophète fine sémé.

« **Wallaahu laa yuhibbul fasaad** » - Mais ça bane kalité ditort là pas faire Allah plaisir ça. Kan ou azir d'après l'instruction d'Allah et pour faire zot vivre dans chemin d'Allah, to trouve ene l'arrogance prend zot et pour ça bane hypocrites là, pour zot, zot fine attiré avec la vie lors la terre et dans l'amusement et lors là zot moque bane ki ena la foi. Bane ki vivre dans chemin Allah, et ça bane dimoune ki fine gagne ene la foi sincère, zot donne zot la vie avec désir pour faire plaisir Allah et bane hypocrites faire toute sorte kalité commentaire et bouffonneries. Zot pensé ki Allah ti bizin prend permission avec zot avant Li donne So faveur à n'importe ki sanlà. Allah dire : « **Wallaahu yarzuqu mayy yashaaa'u bi'gayri hisaab** ». Allah donne So faveur à dimoune ki Li oulé, sans rende compte à personne.

Hypocrites c'est bane ki laisse zot attiré par zot passion pou bane choses ki zot envie ki zot vine ene autoritaire. Kan lézot dimounes guette zot pé vini, si zot (ça bane dimounes là) pé assisé, bizin lévé, saluer Monsieur l'Hypocrite, et toujours zot content ki pouvoir reste dans zot la main et zot bane travail ki zot faire pas pour profite zot nannié, ni lors la terre, ni dans la vie future.

Malgré ki bane hypocrites, Allah <sup>(swt)</sup> fine donne zot toute sorte kalité signes et preuves, zot continuer cause division et disputer comme-ci c'est zot ki bane grand savant ki conne tous, c'est zot ki ena raison tous les temps.

Ça bane kalité dimounes là, déshonneur tombe lor zot partout kot zot été. Zot fine appelle colère Allah lors zot même, et la misère aussi frappe zot. Tout ça là parceki zot rejette bane signes Allah et ridiculise le prophète d'Allah et par zot mauvais comportement, ni zot l'argent, ni zot zenfant pas pou profite zot et c'est zot même ki faire du tort à zot propre lécorps.

Bane hypocrites, c'est bane ki pas pou arrête corrompre ou. Zot désire séki faire ou malheur. Zot la haine paraîte depuis zot la bouche, mais séki dans zot lécoeur pli mauvais encore.

Si ene kitchose de bon arrive ou, zot morde zot boute lédoigt avec la rage contre ou, et ça affecter zot. Et si ene malheur arrive ou, zot réjouir avec grand contentement. Zot bane dimounes sans l'intelligence. Pour tous dimounes lors ça la terre là, Allah <sup>(swt)</sup> faire zot passe par bane bonheur et aussi par malheur, chacaine so tour. Pareil couma Allah dire dans Quran Sharrif : « **Wa tilka ayyaamu nudaaw wiluhaa baynannaas.** » – Ça kalité jours là parfois bon et parfois pas bon. Nous donne dimoune à chacaine so tour.

### Pour terminer

Celui qui Allah déshonorer, personne pas capave donne li l'honneur. Allah faire c'est ki Li ouler. 'Bane hypocrites, quand récite avec zot Nous versets comme preuves, to reconnaître lor figure bane qui rejette la foi (bane hypocrites) ki zot pé dir non'. Zot près pou attaque dimoune ki fine lire Nous versets avec zot. Allah dire dans Qur'an : « *Wa a-da-hallaa-hullaziina kafarun, wa bisal masiir* » - C'est difé ki Allah fine promettre (bane hypocrites) qui fine rejette la foi. Qui mauvais destination sa ?

*'Maa qadarullaaha haqqa qadrih : innallaaha la qawiyyun Aziz'* – zot pas estime puissance Allah couma bizin. En vérité, Allah Fort et Grand.

**Par la Grâce Immense d'Allah Le Tout-Puissant**

**Hazrat Amirul Momeneen Muhyi-ud-Din Al-Khalifatullah  
Munir Ahmad Azim**

*17 Septembre 2008*

